

Haldið er dómþing úrskurðar- og aganefndar Körfuknattleikssambands Íslands (KKÍ) föstudaginn 21. október 2011.

Fyrir er tekið:

Mál nr. 1/2011-2012

Knattspyrnufélagið Valur-

körfuknattleiksdeild.

gegn

Ungmennafélaginu Snæfelli,

körfuknattleiksdeild

Í málinu er kveðinn upp svofelldur

ÚRSKURÐUR

I.

Mál þetta er mótttekið af skrifstofu KKÍ 14. október 2011. Kærandi er Knattspyrnufélagið Valur, kt.670269-2569, Hlíðarenda, 101 Reykjavík.

Kærði er körfuknattleiksdeild Ungmennafélagið Snæfell, Borgarbraut 3, 340 Stykkishólmi.

Dómkröfur

Kærandi krefst þess að Knattspyrnufélaginu Vali verði dæmdur sigur í leik félagsins við Snæfell í Iceland Express deild kvenna, sem fram fór miðvikudaginn 12. október 2011.

Engin gögn fylgdu kærinni en vísað til starfsmanns KKÍ, sem sér um félagaskiptamál, varðandi frekari staðfestingu málavaxta.

Kærða var veittur frestur til að skila greinargerð í málinu til miðvikudagsins 19. október 2011 og barst hún aga- og úrskurðarnefndinni þann dag.

II.

Atvik máls

Kærandi lýsir helstu málavöxtum eftirfarandi: „Samkvæmt upplýsingum frá skrifstofu Körfu-
knattleikssambands Íslands (KKÍ) var Kieraah Marlow leikmaður Snæfells ekki komin með
leikheimild þegar leikur Vals og Snæfells hófst klukkan 19:15 miðvikudaginn 12. október 2011
og þar af leiðandi ekki heimilt að taka þátt í umræddum leik“.

Í greinargerð kærða segir m.a. um málsatvik: "Sótt var um öll leyfi vegna Kieraah L. Marlow
sem kom til landsins 6. október. Þann 1. október skuldféllu þátttökugjöld og fleira sem þurfti að
greiða KKÍ til að félagaskipti myndu ná í gegn. Það var gert þriðjudaginn 11. október. Sótt var
um LOC til Finnlands en þar lék leikmaðurinn síðast samkvæmt Eurobasket. En í lok dags 11.
okt. kom í ljós að leyfið hennar hafði verið sent til Perú. Leyfið lenti í tölvupósti 19:24 á leikdegi
eða 9 mínútum eftir að leikurinn hófst."

Samkvæmt greinargerð Kristins Geirs Pálssonar, íþróttafulltrúa KKÍ, sem nefndin kallaði eftir, er
það vinnuregla KKÍ að leikmönnum sé veitt leikheimild um leið og öll skilyrði fyrir útgáfu
slíkrar heimildar hafa borist starfsmönnum sambandsins með sannanlegum hætti, hvort heldur
sem er með tölvupósti, faxi eða bréflega. Jafnframt sé viðkomandi þjálfara eða forsvarsmanni
liðs leyft að fylgjast með framvindu mála þannig að þeim sé jafnan ljóst að sá leikmaður sem í
hlut á sé ekki löglegur fyrr en staðfesting berst frá skrifstofu KKÍ. Skýrt sé kveðið á um það í 7.
gr. reglugerðar KKÍ um gildistöku félagaskipta, að leikmaður verði löglegur með hinu nýja félagi
um leið og KKÍ hefur samþykkt slíka beiðni, enda uppfylli leikmaður hlutgengisreglur og beiðni
hans uppfyllir formreglur reglugerðarinnar.

Í greinargerð Kristins Geirs kemur ennfremur fram að hann hafi ítrekað verið í símasambandi við
þjálfara hins kærða liðs fyrir umræddan leik og skýrt tekið fram að LOC (Letter of Clearance),
sem beðið var eftir, hefði ekki borist. Í þeim samskiptum hafi hann upplýst að notkun á leik-
manninum, án fullnægjandi leikheimildar, þýddi að andstæðingnum yrði að öllum líkindum
dæmdur sigur í leiknum, kæmi fram kæra. Þegar LOC hafi loks borist með tölvupósti kl. 19:23
þann 12. október, þ.e. eftir að leikurinn hófst, hafi hann sent þjálfaranum staðfestingu þess efnis
með SMS skilaboðum. Loks segir í greinargerð Kristins að hann telji þjálfara kærða hafa verið
það fullljóst að sá erlendi leikmaður sem um ræðir, hafi ekki verið komin með leikheimild þegar
leikur hófst.

Málsástæður

Helstu röksemdir kæranda eru þær að samkvæmt 2. mgr. 4. gr. reglugerðar KKÍ um félagaskipti, beri félagi, sem óski eftir heimild fyrir leikmenn með ríkisfang utan Evrópu eða með ríkisfang lands utan FIBA Europe, að senda umsókn þar að lútandi til KKÍ, ásamt leikheimild frá því landi sem hann lék síðast. Jafnframt að samkvæmt 10. gr. reglugerðar KKÍ um körfuknattleiksmót, skuli lið sem mætir ólöglega skipað til leiks teljast hafa tapað leiknum í samræmi við reglur FIBA hverju sinni.

Það sé vinnuregla KKÍ að veita leikmönnum leikheimild allt þar til leikur hefst, berist skrifstofu KKÍ fullnægjandi gögn. Kieraah Marlow, leikmaður Snæfells, hafi hins vegar ekki verið komin með leikheimild frá því landi sem leikmaðurinn lék síðast í, þegar umræddur leikur hófst, samkvæmt upplýsingum sem aflað hafi verið frá skrifstofu KKÍ. Hafi fulltrúi Snæfells verið í sambandi við skrifstofu KKÍ og því átt að vera það ljóst að leikheimild hafði ekki borist þegar leikurinn hófst. Snæfell hafi því teflt fram ólöglega skipuðu liði í skilningi reglugerðar KKÍ um körfuknattleiksmót.

Í röksemdarfærslu kærða kemur m.a. fram að það hafi ekki hafi verið ásetningur að brjóta reglur, heldur byggt á þeirri tilfinningu að leyfið myndi vera í lagi. Hvergi komi fram í reglugerð um félagaskipti klukkan hvað á leikdegi LOC þurfi að hafa borist, auk þess sem fram komi á heimasíðu KKÍ að Kieraah L. Marlow hafi fengið leikheimild 12. október. Þar sem kærði hafi uppfyllt öll skilyrði varðandi leyfi fyrir leikmanninn og aðeins beðið eftir framkvæmd annarra sambanda, sé spurning hvort ekki nægi samkvæmt gildandi reglugerð að LOC berist sama dag, þ.e. áður en dagur er úti.

III.

Niðurstaða

Samkvæmt fyrirliggjandi gögnum í málinu fór leikur Vals og Snæfells í Iceland Expressdeild kvenna, fram í Vodafone-höllinni miðvikudaginn 12. október 2011. Í umræddum leik tefldi lið Snæfells fram leikmanninum Kieraah Marlow, sem samkvæmt upplýsingum frá skrifstofu KKÍ, sem úrskurðar- og aganefnd kallaði eftir í kjölfar kærunnar, var ekki komið með fullnægjandi leikheimild þegar umræddur leikur hófst.

Samkvæmt staðfestri leikskýrslu úr umræddum leik var Kieraah Marlow skráður liðsmaður Snæfells og spilaði í treyju nr. 4. Þá er ljóst af skráningum í leikskýrslu að leikmaðurinn tók þátt í leiknum.

Samkvæmt 2. mgr. 10. gr. gildandi reglugerðar um körfuknattleiksmót, telst lið sem mætir ólöglega skipað til leiks og félag sem notar leikmann, þjálfara eða forystumann í leikbanni, hafa tapað leiknum í samræmi við reglur FIBA hverju sinni, en samkvæmt 2. mgr. 1. gr. sömu reglugerðar eru samþykktir Alþjóðakörfuknattleikssambandsins (FIBA) og Körfuknattleikssambands Evrópu (FIBA Europe) bindandi fyrir KKÍ.

Þar sem fyrir liggur í málinu að Kieraah Marlow var ekki komin með fullnægjandi leikheimild til að spila með liði Snæfells þegar leikurinn hófst, verður að líta svo á að Snæfell hafi, í leik sínum við Val í Iceland Expressdeild kvenna, þann 12. október 2011, teflt fram ólöglegum leikmanni, þrátt fyrir að fullnægjandi leikheimild hafi borist meðan á leik stóð. Ekki verður talið að það nægi að leikheimild hafi borist fyrir lok þess dags sem leikur fer fram, heldur verði að miða við upphaf leiks, enda felur "leikheimild" eðli málsins samkvæmt í sér heimild til þátttöku í leik eða leikjum með tilteknu liði á meðan slík heimild er í gildi. Framangreind niðurstaða er einnig í samræmi við orðalag ákvæðis 2. mgr. 10. gr. reglugerðar um körfuknattleiksmót um að lið verði að vera löglega skipað þegar þau mæti til leiks.

Með vísan til þess og tilvísadara ákvæða reglugerðar KKÍ um körfuknattleiksmót, verður því að fallast á kröfu Vals, þess efnis að félaginu verði dæmdur sigur í leik félagsins við Snæfell, sbr. og ákvæði a. liðar 1. mgr. 12. gr. reglugerðar um aga- og úrskurðarmál.

ÚRSKURÐARORÐ.

Úrslit leiks Vals og Snæfells í Iceland Expressdeild kvenna, sem fram í Vodafone-höllinni miðvikudaginn 12. október 2011 s.l. eru felld úr gildi. Vali er dæmdur sigur í leiknum 20-0.

Ingimar Ingason, formaður.

Þórólfur Heiðar Þorsteinsson

Björgvin H. Björnsson

Kristinn G. Kristinsson

Árni Helgason,

Ágúst Jóhannesson vék sæti við afgreiðslu málsins vegna vanhæfis.

Úrskurðurinn er sendur skrifstofu KKÍ í tölvupósti og henni falið að birta hann fyrir málsaðilum. Úrskurðinn skal birta á heimasíðu KKÍ í samræmi við ákvæði 11. gr. reglugerðar KKÍ um aga- og úrskurðamál.